

【古詩十九首】補充

★【古詩十九首之一】《行行重行行》★

行行重行行，與君生別離。相去萬餘裏，各在天一涯。
道路阻且長，會面安可知。胡馬依北風，越鳥巢南枝。
相去日已遠，衣帶日已緩。浮雲蔽白日，遊子不顧返。
思君令人老，歲月忽已晚。棄捐勿復道，努力加餐飯。

★【古詩十九首之二】《青青河畔草》★

青青河畔草，鬱鬱園中柳。盈盈樓上女，皎皎當窗牖。
娥娥紅粉妝，纖纖出素手。昔為娼家女，今為蕩子夫。蕩子行不歸，空床難獨守。

★【古詩十九首之六】《涉江采芙蓉》★

涉江采芙蓉，蘭澤多芳草。采之欲遺誰，所思在遠道。
還顧望舊鄉，長路漫浩浩。同心而離居，憂傷以終老。

★【古詩十九首之九】《庭中有奇樹》★

庭中有奇樹，綠葉發華滋。攀條折其榮，將以遺所思。
馨香盈懷袖，路遠莫致之。此物何足貴，但感別經時。

★【古詩十九首之十五】《生年不滿百》★

生年不滿百，常懷千歲憂。晝短苦夜長，何不秉燭遊！為樂當及時，
何能待來茲？愚者愛惜費，但為後世嗤。仙人王子喬，難可與等期。

★【古詩十九首之十八】《客從遠方來》★

客從遠方來，遺我一端綺。相去萬餘里，故人心尚爾。文彩雙鴛鴦，
裁為合歡被。著以長相思，緣以結不解。以膠投漆中，誰能別離此？

★【古詩十九首之十九】《明月何皎皎》★

明月何皎皎，照我羅床緯。憂愁不能寐，攬衣起徘徊。客行雖云樂，
不如早旋歸。出戶獨彷徨，愁思當告誰！引領還入房，淚下沾裳衣。